



Øygarden mdg

VALPROGRAM 2023 – 2027

MILJØPARTIET DEI GRØNE I ØYGARDEN

INNLEIING: GODE, GRØNE LIV FOR ALLE I ØYGARDEN KOMMUNE

Kjære veljar! Vi er glade for at du no les starten på valprogrammet til Øygarden MDG før det viktige kommunestyrevalet i haust. Programmet er grundig arbeidd med, og vi meiner det innehold politikken som trengst for å ta Øygarden i ei ny retning. Vi håpar du blir med heilt til siste side!

Grøn politikk er meir enn berre klimatiltak. Vi i Øygarden MDG skal jobbe hardt for ei framtidsretta og solidarisk omstilling av kommunen på fleire område, i tråd med kjernen i grøn ideologi. Kva vil dette seie i praksis? Grøn politikk betyr solidaritet for alle: både eigne innbyggjarar og våre naboar, regionalt og globalt, i dag og i framtida. Det går ein grøn tråd mellom eit lågare forbruk, lågare utslepp, meir fritid og meir solidaritet – dette er kjernen i grøn ideologi.

Vi vil at Øygarden skal vise veg i omstillinga til eit samfunn i balanse med naturen, samstundes som at innbyggjarane i kommunen skal kunne leve gode liv i alle fasar av livet. Vi heiar på ny teknologi som gir moglegheiter for meir effektiv og lågare ressursbruk enn i dag, gir rom for nye etablerarar i næringslivet, og dermed sikrar arbeidsplassar langt inn i framtida.

Det er òg viktig å vere solidarisk med dei som kjem etter oss. Våre barn og barnebarn fortener å overta ein kommune i minst like god stand som då vi overtok. Skal vi kunne kalte oss eit berekraftig samfunn, er dette kanskje det viktigaste. Det handlar om å gi framtidas generasjonar håp i ei tid der det kanskje trengst meir enn nokon gong.

For alle, for alltid – godt val!



Andreas Ormevik, førstekandidat

INNHOLDSTYKKE

Våre hjartesaker i kommande valperiode	3
1 Vi gjer Øygarden til eit grønt fyrtårn i vest	4
2 Gode kvardagsliv for alle	5
3 Natur og miljø	6
4 Oppvekst og skule	7
5 Helse og omsorg	8
6 Grøn samferdsle og mobilitet	9
7 Lokalt næringsliv	10
8 Grøn og rettferdig styring av kommunen	12

VÅRE HJARTESAKER I KOMMUNDE VALPERIODE

1. Heilskapleg og berekraftig areal- og naturforvaltning



FNs naturavtale frå Montreal i 2022 gir ikkje rom for tolking – vi må verne meir natur! Vi vil arbeide for vern av 30 % av all natur i Øygarden, gjennom at kommunen definerer vernesoner i eigna område både på land og i sjø, og praktiserer heilskapleg og streng forvaltning av strandsona i kommunen. Kartlegging av naturmangfaldet både på land og i sjø må styrkast, og kunnskapen om naturverdiar i kommunen skal vere førande for arealforvaltninga. Vi vil få på plass ein arealrekneskap som skal nyttast til både klimabudsjettering og utbyggingsplanar, for å nå måla ein har sett seg.

2. Auka grøn mobilitet i heile kommunen

Øygarden MDG er garantisten for at det skal bli enklare å klare seg utan eigen bil i åra som kjem. Vi vil jobbe opp mot Skyss for å få på plass gode løysingar for innbyggjarar i heile kommunen. Høg frekvens på busstilbodet langs hovudaksane i kombinasjon med nye løysingar for bestillingstransport vil gi eit betre tilbod til fleire enn i dag. For mjuke trafikantar er trygge skulevegar med låge fartsgrenser eller samanhengande gang- og sykkelpsti viktige prioriteringar for Øygarden MDG.



3. Livskvalitet i nærmiljøet

Vi ønsker gode, grøne liv for alle innbyggjarar i Øygarden kommune. Grøn ideologi handlar om å redusere takten på forbruk og vekst, for å redusere ressursmengda som blir nytta ned til eit berekraftig nivå. Det gir samstundes meir tid til slikt som gir betre livskvalitet! Vi vil arbeide for naturopplevingar for alle, og jobbe for å fjerne mest mogleg lokal lys- og lydforureining. Vi vil skape fleire møteplassar både for unge og eldre, og legge til rette for fleire møte på tvers av generasjonar.

4. Eit næringsliv for framtida

Øygarden er ein god kommune å drive næringsliv i, men vi meiner at fokuset på grøne og berekraftige verksemder må aukast. Verksemder som legg til rette for lokal turisme må få gode vilkår – kommunen har så mange kvalitetar som vi må vise fram! Vi vil styrke satsinga på den lokale bonden, med lokalt tilpassa jordbruk og kortreist matproduksjon. Næringslivet kan spele ei nøkkelrolle i omstillinga til eit meir berekraftig samfunn, men då må rammevilkåra vere til stades. Når det gjeld energiforsyninga i kommunen, vil vi heie fram lokal småskala energiproduksjon, til dømes varmepumper og solceller på eigna tak, og styrke satsinga på energieffektivisering.

1 VI GJER ØYGARDEN TIL EIT GRØNT FYRTÅRN I VEST

«Eit fyrtårn i vest» er eit slagord som forpliktar. Skal vi i Øygarden gjere alvor av denne visjonen, må vi vere heilt fremst når det gjeld offensive klimatiltak og heilskapleg utvikling av kommunen. Karbonfangstanlegget på Kollsnes vil i første rekke fjerne utslepp andre stader, og vi må no ta ansvar for å kutte i utsleppa kommunen sjølv står bak, både direkte og indirekte. Øygarden MDG vil gjere kommunen om til eit faktisk fyrtårn for berekraftig utvikling, og har løysingane som skal til for å få dette til i praksis.

Øygarden MDG vil:

- at kommunen skal styrast etter klimarekneskap som gir god oversikt over utslepp, og at vedtak sikrar at ein når måla om utsleppskutt
- arbeide for 300 GWh lokal energiproduksjon i kommunen i 2035, nok til å gjere alle hushald sjølvforsynte med straum
- fremje mål om netto nullutslepp frå eigne kjelder (ikkje sjø- og luftfart) innan 2030
- krevje lågutsleppsløysingar i anleggsarbeid på oppdrag frå kommunen innan 2030
- stille krav om nullutsleppsløysingar innan 2030 for skip som ligg til kai, til dømes landstraum eller mobile brenselceller
- at ved etablering av nye bustadfelt skal utbyggaren legge til rette for straumproduksjon frå solceller på tak
- arbeide for nye tilskotsordningar for energisparring i kommunal regi
- stimulere til oppgradering av eksisterande bygningar (både einebustader og næringsbygg), både gjennom ENØK-tiltak og ettermontering av varmepumper og solcelleanlegg
- gjennomføre energikartlegging av alle kommunale bygg og bygg som får driftsmidlar frå kommunen
- oppgradere til energieffektive bygg og vurdere solceller på alle eigna tak og fasadar
- at det i utbyggingssaker må kompenserast tilsvarande område gjennom vern og restaurering andre stader, på ein måte som sikrar samanhengande naturområde
- styrke kunnskapen om klimatilpassing blant kommunale aktørar og utbyggjarar, og gjennomføre tiltak for å ruste infrastrukturen for meir ekstremvær og høgare havnivå



2 GODE KVARDAGSLIV FOR ALLE

For Øygardsværingar er tilgang på gode natur- og kulturopplevingar viktig for eit godt kvardagsliv, og eit viktig prinsipp for Øygarden MDG er å gjere gode opplevingar tilgjengelege for alle, uavhengig av ressursar. Mange ønskjer seg meir tid til å møtast og til å dyrke eigne interesser, og frivilligheita treng gode rammevilkår for å blomstre i lokalsamfunna slik at vi skapar levande bygder i heile kommunen. Øygarden MDG vil vere ein pådrivar for eit mangfaldig og inkluderande lokalsamfunn på tvers av kultur, religion, legning og funksjonsevne.

Øygarden MDG vil:

- sikre tilgang til naturopplevingar der folk bur, gjennom betre merking og vedlikehald av turstiar og lett tilgjengeleg informasjon om moglegheitene som finst
- fremje biblioteka som viktige møteplassar i lokalsamfunna og som arenaer for kulturopplevingar og leselyst
- legge til rette for eit variert kulturtilbod i alle delar av kommunen
- gjere det enklare å gjennomføre tiltak og prosjekt som tek vare på kystkulturen vår
- styrke satsingar på utleige av utstyr, og legge til rette for meir ombruk og reparasjon



- forby privat oppskyting av fyrverkeri i heile kommunen, og offentlege markeringar skal nytte lysshow eller andre former for underhaldning i staden for fyrverkeri
- arbeide for at kommunen på alle vegar og offentlege bygg og område skal nytte smart belysning, som skrur seg på ved bevegelse og elles er skrudd av eller dempa
- utarbeide ein communal handlingsplan for å få oversikt over lys- og lydforureininga i kommunen, og ut frå den setje i gang tiltak for å redusere den lokale forureininga
- stille krav til utbyggjarar om at nye bustadfelt skal innehalde einingar som er tilpassa alle
- at nye bustadfelt skal vere tilknytt eksisterande felt, for å kunne nytte eksisterande infrastruktur og gi eit lågare klimaavtrykk og påverknad på naturen


3 NATUR OG MILJØ

I lang tid har MDG snakka om at vi har ei naturkrise som er minst like trugande som klimakrisa. I motsetning til for klimagassutslepp globalt har vi som kommune sjølve det fulle ansvaret for naturtap innanfor eigne kommunegrenser. Dermed har vi òg alle moglegheiter for å kunne gjere noko med problemet. Viktige naturtypar, som kystlynghei, og areal med stor evne til å lagre karbon, som myr, må sikrast med eit særskilt vern.

Spesielt viktig er det at vi tek vare på det særeigne kystlandskapet og strandsona vi har her ute. Visste du at Øygarden kommune har den femte lengste kystlinna i heile Noreg? Nærleik til sjøen og unik kystnatur er viktige naturkvalitetar for folk i Øygarden, som vi vil sikre med ein meir ambisiøs plan for kommunen sin arealforvalting. For å kunne ha berekraftige bestandar av fugl og andre dyr må vi òg anerkjenne at naturen har ein eigenverdi som er verdt å ta vare på for all framtid.

Øygarden MDG vil:

- ✿ følgje opp dei internasjonale krava om naturvern, det vil seie 30 % vern av natur i Øygarden både på land og i sjø innan 2030
- ✿ utarbeide ein grundig arealrekneskap med oversikt over klimaeffekten av arealbruk, for å bevare sårbare naturtypar, naturmangfaldet og samanhengande urørte område i Øygarden for kommande generasjonar
- ✿ sikre ei varig streng forvaltning av strandsonelova, og at utbygging av nye naust og kaianlegg berre skal skje i eller i forlenginga av eksisterande regulerte område på ein måte som ikkje går ut over strandsona tilgangen til sjøen for innbyggjarane i Øygarden
- ✿ ta opp att visjonen om ein marin verneplan for Krossfjorden (nedstemd av kommunestyret i 2021), som ifølgje Miljødirektoratet er «eitt av dei best dokumenterte marine kystområda i Noreg, med stort dokumentert mangfold av artar»
- ✿ arbeide for eit landskapsvernområde langs heile kyststripa vår mot havet i vest, for å sikre skånsam bruk og eit vern mot utbygging i områda som i dag framstår som inngrepsfrie



- ▢ støtte opp om velforeiningar og frivillige organisasjonar i deira arbeid for strandrydding og oppsamling av plast og anna forsøpling i naturen
- ▢ auke merksemda og kunnskapen knytt til dyrevelferd, og arbeide for tiltak som betrar helse og livskvalitet både hos husdyr og oppdrettsfisk
- ▢ skifte ut alle biologisk «daude» grøntareal med blomsterenger, og redusere omfanget av kantslått i grøftekantar og i offentlege fellesareal
- ▢ plante nyttevekstar som bærbuskar og frukttre i eigna område på offentleg grunn
- ▢ arbeide for å redusere bruken av vegsalt på kommunale vegar og fortau, utan at trafikktryggleiken vert redusert
- ▢ arbeide for å gi barn og unge tilgang til rike naturopplewingar og auke deira forståing for naturverdiane som finst i kommunen, mellom anna ved å etablere skulehagar der barna sjølv får ansvaret for dyrking og hausting
- ▢ at nye turstiar må byggast på ein skånsam måte, og i avgrensa omfang i område der mange nyttar naturen frå før

4 OPPVEKST OG SKULE

MDG er eit framtidsretta parti, og heilt sentralt i vår ideologi er å sikre livsgrunnlaget for kommande generasjonar. Vi må styre etter prinsippet om at neste generasjon skal ha like gode eller betre moglegheiter til å leve gode og trygge liv enn vi har hatt. Då er det viktig å gi dei unge ein trygg oppvekst og ein god skulegang, og at utfordringane deira vert tatt på alvor og løyste raskast mogleg. Dette er prioriteringar som vil krevje økonomiske ressursar no, men som vil vere klart lønnsame i lengda. At barna våre kjenner tryggleik, trivsel og meistring, og får ei kjensle av å høyre til, er grunnleggande behov som må prioriterast uavhengig av den økonomiske situasjonen på kort sikt.

Øygarden MDG vil:

- ▢ løfte fram meir undervisning i praktisk-estetiske fag, med særleg fokus på kunst, kultur og fysisk aktivitet
- ▢ teste ut meditasjon i skulen som eit tiltak for å skape ro og eit godt læringsmiljø
- ▢ gi alle elevar tilgang til kunnskapsbasert opplæring om seksualitet, samtykkekompetanse og kjønnsidentitet på skulane
- ▢ styrke ungdomsarbeidet i kommunen, mellom anna ved å gjere Ungdomstenesta til ei fast teneste
- ▢ sikre fleire møteplassar for barn og unge, mellom anna ved å etablere anlegg for lågterskel eigenorganisert aktivitet, på allereie utbygde areal





- auke graden av utnytting av eksisterande idrettshallar og utandørsbanar for idrett, og stanse bruken av nye areal til fleire store idrettsanlegg
- etablere nye og vidareutvikle eksisterande ungdomsklubbar
- sikre betre bemanning i barnehagane og gi personalet meir tid til individuell oppfølging
- tilsetje fleire spesialpedagogar i barnehagane
- ha ein leksebevisst skule
- sikre at alle elevar har tilbod om analoge skulebøker på si eiga målform, og redusere bruken av skjerm i skulen
- arbeide for at skulekvardagen skal vere mobilfri
- støtte opp om ei TAF-line på Sotra tilpassa ønske frå lokale offentlege og private verksemder

5 HELSE OG OMSORG

Øygarden MDG vil arbeide for å styrke den generelle folkehelsa i alle lag av befolkninga, gjennom tilgang på gode opplevelingar og eit fullverdig tenestetilbod i alle delar av kommunen. Vi vil ha fokus på inkludering i samfunnet for å motverke utanforskap og skape god fysisk og psykisk helse for både vaksne og barn. Ved å legge til rette for levande lokalsamfunn der alle føler seg inkluderte, vert det rom for meir frivilligheit på tvers av generasjonane. I åra som kjem, vil andelen eldre i kommunen auke, og dei eldre vil ha god fysisk helse og ønske eit meir variert aktivitetstilbod. Øygarden MDG vil legge til rette for større deltaking i samfunnet gjennom heile livet for endå fleire enn i dag.

Øygarden MDG vil:

- fremje friluftsliv og auke bruk av naturen, på naturen sine premissar
- legge til rette for og auke kunnskapen i befolkninga om korleis ein kan leve meir berekraftig, ved å oppmuntre til meir dyrking av eigen mat og meir ombruk og reparasjon
- sikre raskare hjelp til unge som har utfordringar med den psykiske helsa
- legge til rette for meir fleksible arbeidstidsordningar for tilsette i helse- og omsorgssektoren
- samarbeide tett med frivillige organisasjonar og studentar innanfor helseyrka for å kunne gi eit større og meir variert aktivitetstilbod til dei eldre
- arbeide aktivt for å utnytte kommunen sine eigedomar, og planlegge for bufellesskap der eldre kan ha kort veg til helsetenester som heimesjukepleie, i tillegg til sosiale møteplassar og aktivitetssenter

6 GRØN SAMFERDSLE OG MOBILITET

Øygarden MDG vil gjere det enklare å la bilen stå, og skape ein enklare kvardag for dei som ikkje har eigen bil. Vi kan bli ein leiande distriktskommune for mobilitet med bruk av ny teknologi og nye løysingar for å dekke transportbehova på ein smart og berekraftig måte. Byggeperioden for Sotrasambandet må nyttast til å etablere nye reisevanar, slik at den nye vegen løyser opp dagens kø utan at personbiltrafikken aukar utover nivået i dag. I tillegg prioriterer vi trafikktryggleiken for mjuke trafikantar og vil hindre at verdifulle naturområde vert ofra for utbygging av nye vegar.

Øygarden MDG vil:

- arbeide for å sikre eit eige felt for kollektiv- og tungtransport på det nye Sotrasambandet, for at framtidig trafikkvekst skal skje på andre måtar enn med meir solopendling i personbilar
- gjere det enklare å la bilen stå, til dømes ved å legge til rette for fleire billige innfartsparkeringar og lågare parkeringstakstar for pendlarar
- arbeide opp mot Skyss for å auke kapasiteten på hovudaksane for buss, kombinert med matebussar/bestillingsbussar i områda som i dag har därlege eller ingen kollektivtilbod
- gjennomføre haldningskampanjar for samkjøring, og støtte initiativ til bestillingstransport og bruk av mindre køyretøy til kollektivtransport
- krevje at trygge skulevegar vert prioriterte høgast mellom samferdsletiltaka i kommunen, med samanhengande gang- og sykkelstiar og reduserte fartsgrenser rundt alle skular
- prioritere Vestsidevegen og jobbe for heilskapleg oppgradering av strekninga, slik at det vert ein tofeltsveg etter Vegvesenets standardar og med gang- og sykkelsti heile vegen
- fortsetje innsatsen mot utbygging av motorveg i Midtmarka mellom Kolltveit og Ågotnes som vil øydeleggje og fragmentere eit av dei siste urørte, samanhengande naturområda i Øygarden
- sjå på tiltak langs dagens Fv. 561 som kan betre trafikkflyten og støysituasjonen mellom Kolltveit og Ågotnes



7 LOKALT NÆRINGSЛИV

Øygarden MDG meiner at utviklinga av næringslivet i Øygarden må basere seg på dei fortrinna vi har som kommune, både geografisk og gjennom vår lange kompetanse frå olje- og gassindustri, som kan nyttast til omstilling til grøne industriar. Dei næraste åra kjem ein vedvarande olje- og gassproduksjon til å vere viktig både for kommunen og for energitryggleiken i Europa, men samstundes må vi arbeide for ein kontrollert overgang til ny og fossilfri industri.

Vi ønsker å skape fleire arbeidsplassar innanfor landbruk og havbruk, med økologisk balanse som føresetnad for vidare vekst. Vi vil i samråd med næringslivet fastsetje gode rammevilkår som sikrar grøn omstilling på ein måte som ikkje får store negative konsekvensar for nærmiljøet, dyrelivet eller dei særeigne naturverdiane våre. Dette prinsippet skal òg gjelde i spørsmål om utbygging av energiproduksjon i kommunen.

Det grøne skiftet handlar om meir enn berre kutt i klimagassutslepp. Øygarden MDG vil arbeide for ein overgang til ein meir sirkulær økonomi, med færre nye ressursar i omløp og smartare og lågare energibruk som overordna mål.

Øygarden kommune er mellom kommunane i Vestland som bygger ned mest dyrka jord, og vi ligg langt over nasjonale målsetjingar. Slik kan vi ikkje fortsetje å forvalte ein så dyrebar ressurs! Øygarden MDG vil styrke satsinga på den lokale kystbonden, og heiør på alle som vil auke forsyningsgraden av lokalmat produsert på ein berekraftig måte. Då held vi kulturlandskap og kunnskap i hevd, og aukar verdiskapinga. Meir mat produsert på utmarksressursar er dessutan god beredskapspolitikk.

Øygarden MDG vil:

- legge til rette for meir bruk av utmarksbeite, for å kunne auke matproduksjonen og redusere brannfaren i utmarka
- krevje full stans i nedbygging av matjorda i kommunen
- støtte opp om produksjon av lokalprodusert mat, mellom anna ved å velje lokale produsentar for mat til servering i kommunale institusjonar når det er mogleg
- arbeide med nabokommunane våre om ein regional strategi for å fremje lokal og berekraftig turisme



- bevare kompetansen som finst og arbeide for grøn omstilling av industrien
- premiere miljøvennleg havbruk og anna berekraftig næringsverksemd der ressursar vert utnytta på ein god måte
- arbeide for fortetting på store industriområde og næringsareal som i dag er därleg utnytta, ved å nytte parkeringsplassar og tomme område til andre føremål, samlokalisere kontor- og lagerbygg, og bygge meir i høgda
- føre ein restriktiv politikk for etablering av næringsareal i ubygde område der reelt grøne industrier, det vil seie initiativ som bidrar til klimagassutslepp i eit livsløpsperspektiv utan store inngrep i sårbar og ubygdt natur, skal få forrang i spørsmål om etablering i Øygarden
- vidareutvikle Øygarden næringsutvikling KF som eit kommunalt føretak som rettleier og bidrar til grøn omstilling og berekraftige industrier
- arbeide for fleire lærlingplassar i kommunal regi
- støtte teknologiutvikling og pilotprosjekt knytte til lokal energiproduksjon som er tilpassa dei geografiske føresetnadene i kommunen utan å vere ein trussel for dyrelivet eller livskvaliteten til folk
- legge til rette for ny satsing på flytande bølgjekraft utanfor Øygarden, og arbeide for at industrien i kommunen skal bli ein viktig faktor i utbygginga av havvind som er venta dei neste 10–15 åra i Noreg



8 GRØN OG RETTFERDIG STYRING AV KOMMUNEN

Ein kommune har eit stort ansvar for å gå føre med eit godt eksempel i alt han gjer. Øygarden MDG tek kampen for ein meir open kommune og eit lokaldemokrati som involverer lokalbefolkninga i viktige vedtak på ein betre måte enn i dag. Vi vil flytte fleire avgjersler ut av lukka rom!

Vi meiner kommunen har eit viktig ansvar for å omstille samfunnet raskt til meir berekraft og meir sirkulær tankegang, og på den måten skape ei haldningsendring som kan inspirere heile befolkninga til å gjere det same.

Dessutan har kommunen eit ansvar for å sikre gode tenester til heile befolkninga, spesielt i ei tid når kostnadane for folk flest held fram med å auke. Dei siste åra har det vore gjort ei rekke kutt i budsjetta med liten økonomisk gevinst, men med store negative konsekvensar for velferda til dei som vert ramma av kutta. Harmonisering og innsparing vil over tid føre til ei sjukare befolkning med lågare livskvalitet, og gje kommunen store meirkostnadar.

Øygarden MDG vil sjå på moglegheita for å innføre ein rettferdig eigedomsskatt på bustader med eit høgt botnfrådrag. Inntektene skal ikkje gå til å dekke den normale drifta av kommunen, men skal øyremerkast nye grøne tiltak som kjem innbyggjarane til gode, til dømes støtte til straumsparingstiltak og installering av varmepumper.

Øygarden MDG vil:

- innføre eit lovpålagt lobbyregister for alle parti, på same måten som MDG allereie har praktisert det frivillig i lang tid
- gi innbyggjarane meir innverknad gjennom større openheit i politiske prosesser
- arbeide for at kommunale brev og plandokument skal skrivast i eit kortfatta og klart språk
- jobbe for å auke oppslutninga rundt lokaldemokratiet
- innføre krav om eit vegetarisk serveringstilbod i alle offentlege samanhengar
- arbeide for at kommunale anskaffingar skal brukast aktivt for å sikre gode løysingar for natur, klima og lokalmiljø og for å styrke det lokale næringslivet
- styrke vedlikehaldet og ombruken av kommunalt eigde bygg
- arbeide for å gjere Øygarden til ein «plastsmart» kommune som kartlegg kjelder til plastforureining og utarbeider handlingsplanar for opprydding, med mål om å få ned bruken av plast og nytte plastavfall som ein ressurs

TENK NYTT – STEM GRØNT



John Alvsvåg,
2. kandidat

Annette Henden,
3. kandidat

Andreas Ormevik,
1. kandidat

FØLG OSS I SOSIALE MEDIUM:



OYGARDEN.MDG.NO

VALLISTA TIL ØYGARDEN MDG 2023-2027

1	Andreas Breivik Ormevik	1995	Ågotnes
2	John Alvsvåg	1964	Fjell
3	Annette Henden	1976	Steinsland
4	Hilde Kristin Egeland	1980	Ågotnes
5	Tommy René Oen	1986	Fjell
6	Bjørn Tore Hatletun	1980	Straume
7	Elisabeth Aurora Toft	1973	Kolltveit
8	Ingela Øien	1960	Klokkarvik
9	Michael Blume	1964	Rong
10	Sunniva Henden	1999	Steinsland
11	Snorre Houge Dufva	1979	Straume
12	Anders Birkelid Vindenes	1995	Ågotnes
13	Anett O. Skansen	1979	Kolltveit
14	Christoffer Pedersen	1976	Ågotnes
15	Arve Henningsen	1972	Kolltveit
16	Linda Helene Lid	1962	Straume
17	Arild Monsegaard Halvorsen	1964	Kolltveit
18	Tor André Røkke	1945	Misje
19	Mathilde Alvsvåg	1995	Fjell
20	Bjarne Ravnestad	1971	Knarrevik

Kjekt å vite om Øygarden kommune

- Den femte lengste kystlina i Noreg, med 1525 små og store øyar
- Den nest største kommunen i Vestland, med busetnadar i meir enn 10 000 år
- Strekk seg 6,5 mil i luftline frå nord til sør, med nær 1 000 km med vegar



Kvífor er MDG partiet for deg?

1. Du ønsker å ta vare på meir natur
2. Du vil leve i eit klima- og miljøvennleg samfunn i Øygarden kommune
3. Du meiner kollektivtilbodet fortener eit løft, sånn at fleire i Øygarden kan bli mindre avhengig av eigen bil
4. Du drøymer om trygge lokalsamfunn som er rike på opplevingar for alle
5. MDG vart i sist val kåra til best på
 - politikk for rettane til dyr¹
 - meir likestilt funkispolitikk²
 - human asyl- og flyktingpolitikk³
 - tryggare ruspolitikk⁴

¹ Dyrevernalliansen, ² Norges handikap forbund, ³ NOAS, ⁴ Foreningen Tryggere Ruspolitikk

BLI MEDLEM HER: MDG.NO/BLIMEDLEM



For alle, for alltid

mdg